

**Qimmit qimuttut qimmeqarneq qitsuuteqarnerlu pillugit Inatsisartut inatsisaannit nr. 18, 30. oktober 1998-imeersumit avissaartillugit immikkut inatsisiliuunneqarnissaat pillugu Naalakkersuisut suliaqaqqullugit peqquneqarnissaannik siunnersuut.**  
(Inatsisartuni Ilaasortaq, Kristian Jeremiassen, Siumut)

### **Akissutitut allakkiaq**

(Inuussutissarsiornermut Suliffeqarnermullu Naalakkersuisoq)

Aallarniutigalugu oqaatigerusuppara ataatsimiinnermi matumani oqaluuserisassaniimmat immikkoortoq qimmit qimuttut qitsuuteqarnerlu pillugit Inatsisartut inatsisaannut allannguutissatut siunnersuut. Siunnersuummi pineqarput qimmeqarfiit killingisa allanngortinneri, qimminik piginnittut taarsiiviginninnissamik pisussaatitaanerat, toqutsisarnermut tunngavigisassat, kiisalu qimmit tuloriaajartarnerinut inerteqqutit. Assersuutigalugu allannguutip kingulliup qimmit qeritinneqanngitsumik tuloriaajarnerisa nassatarisaannik pisariaqanngitsumik anniartinneqartarunnaarnerat iluaqutigaa.

Siunnersuutip matuma akuersissutiginerata nassatarissavaa qimmit qimuttut, kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktober 1998-imeersoq inatsisinut marlunnut avinneqarnera. Naalakkersuisut taamatut avitsinissaq kissaatiginngilaat, tunngavippiaralugu qimmit qimuttut inuiaqatigiinni immikkut ittumik inissisimmammata – inuussutissarsiutitut kultureqarnikkullu.

Tullinnguullugu Naalakkersuisut isumaqarput qimmit qimuttut immikkut inissisimanagerat inatsisaasuni attanneqareersoq, qimmit qimuttut atugarisaannut tunngasuusunik inatsimmi immikkut ittunik kapitaleqarmat. Tamatumunnga atasutut aamma uumasut illersornissaat pillugit Inatsisartut inatsisaat innersuussutigerusuppara; tassani (qimmit qimuttut ilanngullugit) uumasut tamarmik pineqarput, qimmit qimuttut ataqineqarnerannut ajornartorsiutinik nassataqanngitsumik.

Inatsiseqarnerup ataqatigiissup paasisassaasullu pilersinneqarnissaa Naalakkersuisut anguniagaraat. Immikkoortortanut ataasiakkaanut atuuttunik sunik malittarisassaqarneranik kikkunnut tamanut paasiuminernerulernissaa iluaqutaavoq. Tamanna ilutigalugu inatsimmut ataatsimut naleqqiullugu inatsisinik marlunnik oqaasertalersugaqarlunilu aqutsisoqarnissaa isumalluutinik amerlanernik pisariaqartitsissaaq.

Qimmit qimuttut, kiisalu qimmeqarneq qitsuuteqarnerlu pillugit Inatsisartut inatsisaannut allannguutissatut siunnersuutaasut qimmit qimuttut atugarisaannik pitsaanngorsaassutit isumannaarinerat Naalakkersuisut isumaqarput, taamaattumillu siunnersuutip itigartitsissutiginnissaa Naalakkersuisut inassutigaat.